

# Gui'ch guxhaal San Pabl loj ree bén Éfeso rililadx Jesucrist

---

Rugajpdioz San Pabl bén Éfeso ree

**1** Naj Pab, najn tijb xi apóstol Jesucrist por xguialrniabee Dios. Cuan gui'ch guie par lëjt guial diidxli zinalidi xtiidx Jesucrist, lëjt guial ma najdi xbejn Dios luguiedx Éfeso. <sup>2</sup>Dux Dad ree Dios në Dad Jesucrist güünle' lëjt yabe'cdxe tëë reeman luxdoodi.

Rüjnle' Dios bén rililadx ree Jesucrist

<sup>3</sup>Quixtëë Dios, xdad Dad Jesucrist, dád benza'c najman, guial yan ma nayajc ree tijbzi con Jesucrist, ma beenle'man dunuj ree diizd xanyabaa con graløj guialnaza'c din gac yunaal ree xtiidxaman. <sup>4</sup>Laaman bacaabee dunuj ree por Dad Jesucrist diizd chi gad guidxliuj gacchaaw din yabajn ree naya sin dol lojman. <sup>5</sup>Abi' guial rënman dunuj ree, diizd guia'xchej beenman guial yayajc ree xi'nman por Jesucrist zi'c beenman xgab gac. <sup>6</sup>Zeel ad racwëëzt raza't ree Dios zagdx guial dád benza'c najman, ma beenle'man dunuj ree por Xi'nman Jesucrist, bén rënman, <sup>7</sup>bén ma gudijx por dunuj ree chi guxhie' xrejnman, abi' ma

gojc perdon dux tol ree guial dád rën Dios dunuj ree. <sup>8</sup>Zeel dád zro' gualrajc në gualrignia' ma bazaladxaman duloj ree, <sup>9</sup>abi' ma balüüman duloj ree xhienaag naj xixgabaman diizd gocli, zi'cgajczi ma beenman xgab gac. <sup>10</sup>Guiáad xgab guin gacan cumplid chi guidxin dxej, Dios gusa'n gra loj Jesucrist zi'c ni yu' xanyabaa në loj guidxliuj.

<sup>11</sup>Nëtëë guial nayajc ree tijbzi con Jesucrist, Dios ma bacaabee dunuj ree din yayajc ree par laaman zi'c naj xixgabaman diizd guia'xchej, din laaman rüjn gra zi'c rënman gac. <sup>12</sup>Abi' laaman ma been zian, din dunuj ree nayajc ree bén yaløj bililadx Jesucrist, yayajc ree bén guza't laaman zagdx por xguialrniabeeman. <sup>13</sup>Nëgajc lëjt chi biguiejndi diidxli xhienaag par gaquidi perdon dxel bililadxidi Cristo gojquidi tijbzi con laaman. Abi' zi'c rëb Dios guial gunee-man xSprijtaman, dxel yan guial ma nabannëdi laaman, laaman naj zi'c tijb sen ni rulüü guial ma najdi par Dios. <sup>14</sup>Guial ma nabannë xSprijt Dios dunuj ree, yaca' ree ni rëb Dios gunee-man chi ma bara

xbejnman za' xanyabaa, din chit́eé yacẃeéz yaza't reeman zagdx0 por xguialrniabeeman.

### Rniab Pab quiargueijn loj Dios

<sup>15</sup>Abi' guial ragbeen rliadxidi Dad Jesús ŕen t́eédi los demazri ree b́en naj xbejn Dios, <sup>16</sup>zeel ad rucẃeézt rud́en quixt́eé loj Dios por ĺejt, beegaj rbedx rniaaban laaman. <sup>17</sup>Laaman naj Dios rniabee diizd xanyabaa, xDad Dad Jesucrist. Rniaaban lojman yazaladxaman quiargueijn lojdi din chignia'di ni gulúúman lojdi gusnuu t́eé gúünbeedi laaman mazri. <sup>18</sup>Rniaaban lojman din guixhialaman xquiargueijndi din chignia'di xhie ŕen guiéb ni rbézidi diizd chi bacaabeeman ĺejt, chignia' t́eédi guial ni za'cdxoon narooob t́eé naj ni nagu'chaaw Dios par ree b́en naj xbejnman. <sup>19</sup>Rniaab t́eén lojman guial gagbeedi guial dád narooob naj xguialrniabeeman ni cayagné dunuj ree raliduladx reeman. Laagajc guialrniabee narooob guin balúú Dios <sup>20</sup>chi basbanman Jesucrist abi' gule'caman laaman xladbeeman xanyabaa <sup>21</sup>lod badéeman guialrniabee lojman ni mazri lasajc guial loj gra ree guialrniabee, né loj gra guialguxtis né loj gra gobiarn. Abi' mazri lasajc guialrniabee guin guial loj gra ree guialrniabee yu', né ni qui chu'ri ree loj guidxliuj guie. <sup>22</sup>Dxel basa'n Dios gran loj Jesucrist, bacaabeeman laaman din nabeeman gra ree b́en rliadx laaman. <sup>23</sup>Guiáad ree b́en rliadx laaman, guidiblagaa nabannéman laa reeman abi' bantééz guin

za'man din laaman guidiblagaa rniabee.

### Nayajc ree perdon guial ŕen Dios dunuj ree

**2** Gocli gojquidi zi'c bengüt loj Dios por ree ni mal né por ree dol <sup>2</sup>ni beendi guial binalidi nejz mal been t́eédi zi'ctzi ŕen xindxab gúündi, sprijtmal ni nabanné gajc ree b́en ad ruzoobt xtiidx Dios. <sup>3</sup>Du gra ree ziangajc babajn ree guia'xchej. Bagueien ree zi'ctzi bayén ree, zi'ctzi goc dux xgab ree, abi' zi'cgajc rayal ree b́en ad ruzoobt xtiidx Dios casti, ziangajc nayal ree casti. <sup>4</sup>Per guial raya da't Dios dunuj ree ŕen t́eéman dunuj ree, <sup>5</sup>zeel majsi bayajc ree zi'c bengüt lojman por dux tol ree, per yan ma raya'p ree guialnaban lojman con Jesucrist. Guial tant benza'c naj Dios, zeel nayajc ree perdon. <sup>6</sup>Chi basbanman Jesucrist négajc dunuj ree basbanman abi' zi'c rulúú ma nadxu'né' ree Jesucrist xanyabaa. <sup>7</sup>Dios been zian din dx0j zééd ree guiguien guial dád ŕenman dunuj ree, abi' benza'c t́eé najman con dunuj ree por Jesucrist. <sup>8</sup>Guial naj Dios benza'c, zeel ma nayajc ree perdon, ad guial nayajct ree benza'c lojman. Por guial rliadx zééd xperdon Dios. <sup>9</sup>Ni'quid por ni zagdx0 ni ma bagueient ree zééd perdon guin chit́eé chu guilies xvalor gajc. <sup>10</sup>Por Dios nadxu' ree loj guidxliuj guie abi' por Jesucrist bachaaman mod babajn ree yal0j din yaguieen ree ni zagdx0 zi'c beenman xgab yaguieen ree diizd gocli.

**Tijbzi nayajc ree por Jesucrist**

<sup>11</sup> Zeel lęjt b́en ad najt ree b́en Israel, gol basaaladx xhienaag guzajquidi yaloj. B́en Israel ree gulę́laj lęjt b́en ad yu't ree sen guial yu' reeman sen zi'c rniabee ley. <sup>12</sup> Tiamp zii ad beenbeetidi Jesucrist, ad gojctidi cwent loj ree b́en Israel ad gojc tę́etidi cwent guial rayalidi ni ręb Dios gudę́eman loj ree xbejnman. Contzi gubajndi achet gulę́zidi ad gubajnnę́ tę́etidi Dios. <sup>13</sup> Per yan guial ma riladxidi Jesucrist, lęjt guial guzujdi zijt loj Dios, por xrejn Jesucrist ma bibiguide lojman. <sup>14</sup> Din Jesucrist babe'cdxe du luxdoo ree. Laaman bisüd guialrdxe'ch ni rudxoon gac ree b́en Israel tijbzi con ree b́en ad najt b́en Israel. <sup>15</sup> Abi' por xguialgųjt Jesucrist gulox gra ree costumbr rniabee xley ree b́en Israel gųin ree bejn, laaman been persi gojc ree b́en Israel con ree b́en ad najt b́en Israel zi'c tijbzi guiedx cüb guial ma nayajc ree tijbzi con laaman. Zian babe'cdxeman luxdoo ree bejn. <sup>16</sup> Din por xguialgųjt Jesucrist loj crųjz ma gulox guialrdxe'ch lasa' ree b́en Israel con ree b́en ad najt b́en Israel, abi' ma nadxu'nę́ ree Dios zagdxe guial ma nayajc ree tijbzi por Jesucrist. <sup>17</sup> Abi' laaman bidgagojn dugra ree, zi'c ree b́en Israel zi'c ree b́en ad najt b́en Israel xhienaag yadxu'nę́ ree Dios zagdxe. <sup>18</sup> Dxel por Jesucrist grop cwaa ree bejn ma rajp nejz par loj Dios guial tijbzi naj xSprijt Dios nabajnnę́ ree. <sup>19</sup> Zeel ad najtridi zi'c b́en zę́ed lod ren, zi'c benzit loj Dios, ma najdi cwent loj ree xbejnman,

ma najdi tijbzi con ree xbejnman.

<sup>20</sup> Lęjt naj zi'c xze' tijb yu ni cayajc, guiáad ree xi apóstoles Jesús con ree b́en badę́ xtiidx Dios loj ree bejn, naj reeman zi'c xcimiant yu guin, guiáad Jesucrist naj zi'c guial zobjloj ni cayajcnę́ yu guin. <sup>21</sup> Abi' guial yagaj guzuloj cayajs yu guin, dxel cayę́'pzi cayę́'p ze' guin ni cayguie'ch ree najdi din yayajc ree tijbzi xyadoo Dios con Jesucrist. <sup>22</sup> Nę́ yan guial ma najdi tijbzi con Jesucrist ma naj tę́edi tijbzi con los demazri compniar raliduladx reeman din yayajc ree tijbzi yadoo lod za' Dios por xSprijtaman.

**Cwabee Pab din chigneeman xtiidxza'c Jesucrist**

**3** Por zianan yu'n ladxguuib, naj Pab guial cayünan sirv loj Jesucrist din günan yudar lęjt b́en ad najt ree b́en Israel. <sup>2</sup> Lęjt ragbee guial naj Dios benza'c zeel baneeman dxiin guin lon din günan lęjt yudar chignia'di xtiidxaman. <sup>3</sup> Abi' laaman balüü naj xhienaag naj xixgabaman diizd gulal, zi'cgajczi ma rnin lojdi diizd guia'xchej. <sup>4</sup> Chi goolidi laan, gagbeedi guial ma ragbeen xhienaag naj xixgab Dios par Jesucrist. <sup>5</sup> Tiamp gulal achut gojc niagbee xhienaag naj xixgabaman par Jesucrist, gojcan zi'c tijb ni naguie'ch par ree bejn. Per yan por xSprijtaman ma balüüman laan loj ree xi apóstoles Jesús nę́ loj ree b́en badę́ xtiidx Dios loj ree bejn. <sup>6</sup> Abi' ni goc zi'c tijb ni naguie'ch par ree bejn naj guial por xtiidxza'c Jesucrist, nę́ ree b́en ad najt b́en Israel ma rayal ni gudę́ Dios loj

ree b́en Israel guial ma naj reeman tijbzi, dxel ziangajc ma nayab reeman loj promisejs ni been Dios por Jesucrist.

<sup>7</sup>Naj cugojn xtiidxza'c Jesucrist loj ree bejn, ad guial rayalt ǵunan dxiin guin. Guial naj Dios benza'c, zeel bazaladxaman guialrniabee lon par ǵunan laaman sirv. <sup>8</sup>Naj naj b́en bigra b́en lasajc ta'nz loj gra ree xbejn Dios, per guial naj Dios benza'c, bacaabeeman naj din ǵun diidx loj ree b́en ad najt b́en Israel xcwent xguialnaza'c narooob Jesucrist, <sup>9</sup>ńe par gugojnzan zagdx gra reeman xhienaag naj xixgab Dios b́en been gra, xgab ni ad baluú gajtaman loj ree bejn. <sup>10</sup>Din yan zi'c naj ree b́en rliladx Jesucrist, gagbee gra ree b́en rajp guialrniabee xanyabaa guial gra lojczy guialrajc rajp Dios. <sup>11</sup>Abi' diizd chi gad guidxliuj gacchaaw mal been Dios xgab guial gac zian. Yan ma gojcan cumplid por Dad Jesucrist. <sup>12</sup>Ńe guial raliduladx ree Jesucrist ma raya'p ree nejz par loj Dios, abi' con confians ma zajc yubiig ree lojman. <sup>13</sup>Zeel rnin lojdi ad runayadi por ree guialzi ni cad́eédan por ĺejt, din zagdxen par ĺejt.

#### Dád ŕen Jesucrist dunuj ree

<sup>14</sup>Zeel ruzuxiban loj dux Dad ree Dios; <sup>15</sup>laaman naj Dad loj gra ni yu' loj guidxliuj ńe xanyabaa. <sup>16</sup>Abi' rniaaban lojman por xguialrniabee narooobaman yazaladxaman ĺejt goj ńe guialrniabee por xSprijtaman d́in yayu luxdoodi, <sup>17</sup>guibanńe t́eédi Jesucrist guial rliladxidi laaman. Din zian zi'c diidxli zinalidi zi'c ŕen Jesucrist dunuj ree,

<sup>18</sup>dxel ma zajc gagbeedi con los demazri ree compniar raliduladx ree laaman guial gudédldaj abi' xt banczi naaloj zro' ŕenman dunuj ree. <sup>19</sup>Zeel rniaaban loj Dios gagbeedi plact ŕenman dunuj ree, guial mazri zro' najn guial loj ni raguieen ree xgab, abi' zian guidiblagaa guibanńedi Dios.

<sup>20</sup>Laaman, guial rajpaman guialrniabee par ǵuünman mazri guial loj ni raguieen ree xgab o mazri guial loj ni ranaab ree lojman por xSprijtaman b́en nabajnńe' ree, <sup>21</sup>abi' rayal yaza't reeman zagdx gra dxej ńe gra tiamp por Jesucrist, dunuj ree guial raliduladx ree Jesucrist. Amén.

#### Nayajc ree tijbzi por xSprijt Dios

**4** Naj, yu'n ladxguuib guial cayünan sirv Jesucrist, rniaaban lojdi zi'c ma najdi xbejn Dios, gol gubajn zi'c rayal guiban ree b́en ma naj ree xbejnman. <sup>2</sup>Gol gojc benza'c ńe b́en naxanladx, gol gojp pacens gol gudaan t́eé lasa'di guial ŕen lasa'di. <sup>3</sup>Gol been naguiejn gusnuu gaquidi tijbzi con xyudar xSprijt Dios b́en rabe'cdxe du luxdoo ree par yayajc ree tijbzi. <sup>4</sup>Dunuj ree nayajc zi'c tijbzi cuerp, abi' dugra ree nabajnńe' xSprijt Dios, abi' zi'c ma nayajc ree xbejn Dios, ziangajc raléjz ree ni guneeman. <sup>5</sup>Tijbzi Dad, tijbzi guialrliladx ńe tijbzi guialrrirobnij's raya'p ree. <sup>6</sup>Din tijbzi Dios yu', b́en naj Dad par dugra ree, rniabeeman dugra ree, nabanńeman dugra ree rújn t́eéman ujs dugra ree.

<sup>7</sup>Per tijb gaj dunuj ree ma naj ni yaguieen ree, zi'ctzi ni banee

Jesucrist yaguieen ree. <sup>8</sup>Zianan zeel rëb loj xtiidx Dios:

Chi bayë'paman xanyabaa,  
beenman gan loj gra  
guialrniabee,  
abi' badëédaman loj ree bejn ni  
rayal güün reeman.

<sup>9</sup>Abi', ¿xhie rën guiëb lod rëb "bayë'paman"? Rën guiëban bi'taman loj guidxliuj. <sup>10</sup>Guiáad Jesucrist bèn bi't loj guidxliuj, laagajcaman naj bèn bayë'p xanyabaa persi canabeeman guidib guidxliuj në xanyabaa. <sup>11</sup>Abi' ma badëëman loj ree bejn ni rayal güün reeman, yu' reeman bayal gac apóstoles, yu'za reeman bayal gac bèn rudëë xtiidx Dios loj ree bejn, yu' reeman bayal guitie'ch xtiidxaman, yu' tää reeman bayal gudëë consejw guliüü tää reeman bèn rliladx ree laaman. <sup>12</sup>Zian bacaabee Jesucrist bejn ree din gusiid los demazri ree bèn rliladx laaman, gac tää güün reeman laaman sirv, gusnuu tää güünbee reeman laaman, <sup>13</sup>xt yayaaløj yaliduladx ree yaguieenbee tää ree Xi'n Dios guidiblagaa, din yayaaløj yayignia' ree xhienaag rayal yunaal ree Jesucrist. <sup>14</sup>Dxel ad zayajctri ree zi'c ree xindoo rliladx xhietëëznin, ad zayajctri ree zi'c tijb ni rnë bi niz ni niz guie por graløj ni rü ree bèn raguuil mod gusquiee ree bejn, <sup>15</sup>rayal yayën du lasa' ree, yadü ree diidx yunaal tää ree ni diidxli din gusnuu yayignia' ree yaguieen tää ree zi'c rën Jesucrist bèn rniabee dunuj ree. <sup>16</sup>Din por Jesucrist nayajc ree tibloj gra ree compniar raliduladx ree laaman. Por laaman nadxajg

dulasa' ree nayajc ree tijbzi, abi' tijb gaj dunuj ree con ni rayal yaguieen ree par yaguieen du lasa' ree yudar din gusnuu yayën dulasa' ree por Jesucrist.

#### Guialnaban cüb con Jesucrist

<sup>17</sup>Yan por Jesucrist rnin lëjt: Ad bal guibanridi zi'c naban ree ben ad nünbeet Dios, din laa reeman naban zi'ctzi naj xixgab reeman, <sup>18</sup>nacay xquiarguiejn reeman, ad rajpt reeman guialnaban rën Dios gap reeman, guial ad rignia't reeman ache tää naladx reeman. <sup>19</sup>Ma been luxdoo reeman gojl, ma gulëëladx laagajc reeman abi' cusnuu cayüjn reeman graløj nidxuudx. <sup>20</sup>Per lëjt ad beenbeetidi Jesucrist din guibandi zian, <sup>21</sup>bal walidi ma biguiejndi xcwentaman bal wali täädi ma basiididi diidxli zëed por laaman. <sup>22</sup>Gol basa'n zi'c gubandi yaløj, din ruxhiinzi zi'c gubandi yaløj con xgabmal ni basquiee lëjt guial beendi zi'ctzi guyëndi. <sup>23</sup>Gol been naguiejn guidxaa xixgabidi guidiblagaa <sup>24</sup>din gaquidi zi'c tijb bencüb been Dios zi'c rënman, con tijb guialnaban naya në zi'c rayal por xdiidxliman ni ma biguiejndi. <sup>25</sup>Zeel ad bal rnieeridi diidx rusquiee. Gol gunee diidxli con xcompniaridi din tijbzi nayajc dugra ree con Jesucrist. <sup>26</sup>Bal rdxe'chidi, ad güündi dol. Ad gudxe' guialrdxe'ch guin luxdoodi dëchej, <sup>27</sup>chitëë tiëbidi güün xindxab lëjt gan. <sup>28</sup>Bën rban, rayal gucwëëz cwanman abi' güünman dxiin, din con dxiin zagdxe güünman dxel ma rajpaman con xhie güünman

yudar b́en ryaadx ree xhienin.

<sup>29</sup>Ad rniee t́eedi diidxguijdx, gol guneen ganax diidxzagdxe ni ǵuün yudar chignia' ree ben ren b́en gucaagdiajg ree laan din ǵuünan laa reeman sirv. <sup>30</sup>Ad rgu'nayadi xSprijt Dios, b́en ma nabannedi zi'c tijb sen guial ma najdi xbejnman par dxej ni guidxindi lojman. <sup>31</sup>Gol basa'n tibladd gra guialralenya', guialrdxe'ch, guialralen lasa', guialrguidxa'né lasa', guialrniee diidxguijdx loj lasa' né graloj ni mal. <sup>32</sup>Gol gojc benza'c, gol baya lasa'di gol been t́eé lasa'di perdon zi'c been Dios léjt perdon por Jesucrist.

#### Zi'c ryal guiban ree Xi'n Dios

**5** Zi'c ma najdi xi'n Dios b́en ŕenman, gol been naguiejn ǵuündi zi'c laaman. <sup>2</sup>Gol gubajn zagdxe, gol guyén lasa'di zi'c guyén Jesucrist dunuj ree abi' bayü laagajcaman güjtaman por dunuj ree, gojcaman zi'c tijb gon ni rliaa nejxh par Dios.

<sup>3</sup>Yan léjt guial ma najdi xbejn Dios, ad rayalt guiniee loj lasa'di diidx dxuudx, ni'qui graloj ree ni ad ŕujnt sirv ad rzéébladx t́eedi gra par léjt. <sup>4</sup>Ad rnieedi diidxguijdx ree, diidxtont ree, diidx ni ad rayalt guinieedi din ad ni zagdxet reen. Mazri zagdxe gol badéé quixt́eé loj Dios. <sup>5</sup>Din léjt ma ragbee guial ree b́en naban nadxuudx né ree b́en ŕujn ni ad ŕujnt sirv, né ree b́en rzéébladx gap gra (mazri yu'guijc reeman ni guin ree luar guién reeman Dios), dxel ad zile't chu' reeman lod rniabee Jesucrist con Dios. <sup>6</sup>Gol gojp cudad achu

gusquiee léjt con ree diidx ad ŕujnt wen, din por ree ni guin zééd xcasti Dios par ree b́en ad ruzoobt diidx.

<sup>7</sup>Zeel ad ǵuündi zi'c ŕujn reeman.

<sup>8</sup>Gocli gubajndi zi'c tijb b́en nayaaw xquiarguejn, per yan guial ma najdi tijbzi con Jesucrist, laaman naj biani par léjt. Zeel gol gubajn zi'c ree b́en ma zinal biani guin, <sup>9</sup>din guial chinal bejn biani guin ma zile' ǵuünman ni zagdxe zi'c ryal, né ni naj diidxli. <sup>10</sup>Gol been naguiejn gol been zi'c ruladx Dios. <sup>11</sup>Ad né léjt ǵuün ni ad ŕujnt ree sirv ni ŕujn ree b́en nayaaw xquiarguejn, gol guneené reeman din gagbee reeman ni ŕujn reeman. <sup>12</sup>Din xt ratu bejn güman ni ŕujn reeman ralan. <sup>13</sup>Per por xtiidx Jesucrist laa gagbee gajc reeman xhienin ŕujn reeman. <sup>14</sup>Din zianan zeel réb loj xtiidx Dios:

Batie'ch xbaaalil, lüj guial zinalil nejz mal.

Bariica loj dol din gusni

Jesucrist xquiarguejnl.

<sup>15</sup>Zeel gol gojp cudad xhienaag nabandi, ad gontzi guibandi, gol gubajn zi'c b́en yu' xquiarguejn.

<sup>16</sup>Gol been naguiejn guibandi zi'c ryal naga yu' tiamp, din lén ree dxej guie ad xnejztri naban bejn. <sup>17</sup>Zeel ad gontzi nabandi zi'c naj xixgabidi, gol beenli naguiejn chignia'di xhienaag ŕen Dios guibandi. <sup>18</sup>Ad südxidi, din guialrzüdx guin ruxhiin bejn. Zagdxeli gol cwéjb nabee xSprijt Dios luxdoodi guidiblagaa. <sup>19</sup>Chi rúné lasa'di diidx, gol baza't ni ca loj ree salmos, loj ree himno, né gra loj ree cant ni naj par Dios. Abi' guidib luxdoodi gol biil gol baza't

t́eē Dios zagdxē. <sup>20</sup>Abi' guixie guixie gol bad́eēd quixt́eē loj dux Dad ree Dios por Dad Jesucrist por gra ni ŕijnman par dunuj ree.

**Zi'c rayal guibanńe lasa' ree b́en rililadx Jesucrist**

<sup>21</sup>Gol bazoob xtiidx lasa'di por respejt ni rajpidi Jesucrist. <sup>22</sup>Ńe ĺejt b́engunaa nuxhliaa, gol bazoob xtiidx lacheelidi zi'c ruzoobidi xtiidx Jesucrist. <sup>23</sup>Din xinguaaaw ree rniabee lacheel zi'c rniabee Jesucrist b́en rililadx ree laaman, b́en bab́eē laa reeman loj dol abi' naj reeman xbejnman. <sup>24</sup>Abi' zi'c ruzoob ree b́en rililadx Jesucrist xtiidxaman, ziangajc ree b́engunaa rayal guzoob xtiidx lacheel reeman. <sup>25</sup>Ńegajc ĺejt xinguaaaw nuxhliaa ree, gol guýen lacheelidi zi'c ŕen Jesucrist b́en rililadx ree laaman, abi' xt ǵujtaman por laa reeman <sup>26</sup>persi biśudaman xtol reeman, basiaman laa reeman por xtiidxaman ńe por guialrirobnijs, <sup>27</sup>din guidxin reeman lojman nix da't ńe ni'qui tijb ni mal, sin falt o dol ren ree, guidxin reeman lojman nayadxuj sin dol. <sup>28</sup>Yan ziangajc ree xinguaaaw baxhliaa, rayal guíen lacheel reex zi'c ŕen laagajc reex. Abi' xin ŕen lacheel, laa gajquixan ŕenx. <sup>29</sup>Din ni'qui tijb bejn ad rdxe'cht laagajcaman, ruyaanli laagajcaman rnajchi' t́eē laagajcaman zi'c ŕijnńe Jesucrist dunuj ree nayajc ree b́en rililadx laaman <sup>30</sup>guial nayajc ree tijbzi con laaman. <sup>31</sup>Zeel zi'c ŕeb loj xtiidx Dios: "Xinguaaaw gusa'n xdad xniaax din gaquix tijbzi con lacheelix abi' grop reex ma naj

tijbzi bejn." <sup>32</sup>Dád naẃeēg naj par chignia' bejn diidx guie ree, per caninan din zian naj Jesucrist con ree xbejnman. <sup>33</sup>Yan, xinguaaaw ree, gol guýen lacheelidi zi'c ŕen ĺejt gajc. Guiáad ĺejt b́engunaa, gol gojp respejt lacheelidi.

**6** Ńe ĺejt najdi xi'n, guial zinalidi Jesucrist, gol bazoob xtiidx ree xdadidi, din zian rayal ǵuündi. <sup>2</sup>Abi' mandamient yaloj ni ŕeb guial yu' ni yaca' ree bal yaguieen ree ni ŕeb: "Gojp respejt xdad xniaal, <sup>3</sup>din guibanl zagdxē guiban t́eēl xchej loj guidxliuj guie." <sup>4</sup>Ńegajc ĺejt dad na ad gusagdiaj xi'ndi chit́eē guidxe'ch reex por zian. Mejrli gol basni's reex zagdxē, gol guneeńe reex gol balúü t́eē reex zi'c ŕen Dios. <sup>5</sup>Ńe ĺejt b́en ŕijn ree xchiin bejn, gol bazoob xtiidx b́en naj xpatrondi loj guidxliuj guie. Con guidib luxdoodi gol gojp respejt gol bazoob t́eē xtiidx reeman, gol gunaladx xchiin Jesucristan cayújndi. <sup>6</sup>Gol been reeman sirv ad chi ruguiaatzi reeman ĺejt par yaya'ndi zagdxē loj reeman, gol gunaladx guial Jesucristan cayújndi sirv guial diidxli cayújndi zi'c ŕen Dios ǵuündi. <sup>7</sup>Gol been dxiin con gan, gol gunaladx xchiin Jesucrist cayújndi, ad xchiint b́enguidxliuj. <sup>8</sup>Din ĺejt ma ragbee guial tijbgaj bejn majsi b́en ŕijn xchiin bejn o b́en ad ŕijnnt xchiin bejn, per gud́eē Jesucrist ni rayalaman zi'ctzi naj ni zagdxē beenman. <sup>9</sup>Ńegajc ĺejt b́en naj ree patron, gol gojc benza'c con ree xmojsidi, ma gojczy rusagzidi laa reeman, din ĺejt ragbee guial b́en rniabee laa reeman ńe ĺejt

yu'man xanyabaa, abi' ad rbetaman loj bejn.

### **Gol guzudxi'ch loj ni rliladxidi**

<sup>10</sup>Rni t́een lojdi compniar raliduladx ree Jesucrist, gol guzudxi'ch loj guial ma najdi tijbzi con laaman por xguialrniabee narooaman. <sup>11</sup>Gol gojp ĺejt gajc con xguialrniabee Dios din sudxi'chidi chit́ee ǵuun xindxab ĺejt gan con ree ni rusquiee. <sup>12</sup>Din ad cayguieent ree naguiejn yaguieen ree gan loj tijb ni naj b́eel ńe dxijt, caydijl ree con gra loj sprijtmal zi'c ree ni rajp guialrniabee, guialguxtis ńe gra loj xsprijt xindxab ni yu' ni canabee t́ee loj guidxliuj guie. <sup>13</sup>Zeel gol gojp ĺejt gajc con xguialrniabee Dios din chile' taandi xhiet́eez loj guialzi gui't sudxi'ch t́eedi loj xhiet́eez ni saquidi.

<sup>14</sup>Gol guzudxi'chliza por ni diidxli ni ma ragbeedi, gol basnuu t́ee zi'c rayal guibandi. <sup>15</sup>Gol guzusin par guinieedi xtiidxza'c Jesucrist din por laan yadxu' ree zagdxe con Dios. <sup>16</sup>Gol badxe'guijc t́ee guial guialrliladx ni rajpidi naj ni ragńe ĺejt loj gra ni źeed por xindxab. <sup>17</sup>Ńe ni been Dios perdon xtolidi, laan naj ni rut́ee ĺejt, guiáad xtiidxaman naj zi'c tijb espad ni runee xSprijt Dios lojdi. <sup>18</sup>Ad

gucẃeez cwedx guiniabidi Dios. Gol gudi'n gunab lojman guixie guixie con xyudar xSprijtaman. Gol guzusin par cwedx guiniabidi laaman, ad gucheeladxidi, gol gurejdx t́eeaman por gra ree xbejnman. <sup>19</sup>Gol gurejdx gunab t́eeaman por naj din yazaladxaman naj diidx ni rayal ganen din ganen sin guialrdxeb xtiidxza'c Jesucrist ni zidńe perdon. <sup>20</sup>Dios bacaabee naj par ganen xtiidxza'caman, abi' por zian yu'n ladxguib. Per gol gurejdx gunab Dios chit́ee gadxeban ǵun xtiidxaman zi'c rayal ǵunan.

### **Diidx bigra ca ree loj gui'ch guie**

<sup>21</sup>T́iquico, tijb du lasa' ree b́en rayen da't ree, abi' diidxli cayijnman dunuj ree yudar cayguieen ree sirv Jesucrist, laaman gugojn ĺejt gra xhienaag za'n xhie t́ee cayunán, <sup>22</sup>din par zianczi caxhalan laaman din gugojnman ĺejt xhienaag nadxu'n niz guie yagu' t́eeaman luxdoodi. <sup>23</sup>Rniaaban loj Dios guial gra ree b́en rliladx Jesucrist, cwe'cdxeman luxdoo reeman guien t́ee lasa' reeman, chililadx t́ee reeman laaman ńe Dad Jesucrist, <sup>24</sup>ǵuunle' t́eeaman gra ree b́en wali ren Dad Jesucrist.